



L’ôte fiye, on  
djon.ne mârié s’  
plindéve à s’  
docteûr ki s’piti  
ostèyâdje vinéve  
à prinde ène  
drole di rodjasse  
coleûr.

- Èsse ki dji n’  
vos avéve nén

consiyî d’ vos sièrvu d’ ène djèlêye po rinde  
pus aujis vos raploûs avou vosse feume ? –  
Mins k’sya-da, docteûr. Min.me ki dji a pris  
goût. – Kèski l’ apotikêre vos a doné ? –  
Doné? fauréve valu ! C’ èstéve Bén tro chér  
por mi k’ è-st-au chômadje. L’ djèlêye d’  
gruzèles k’ cût m’ bèle mame a fait nosse  
afêre à Bén mèyeû conte, savoz.

\*

On l’s-ètind totes. On p’tit gamén s’avéve djoké  
au Zoo d’ Anvers au d’vant dèl’ gayole dès  
èlèfants èt dmander c’ki pindéve insi come  
tripe pa pa-dzo s’ vinte. “O, c’ n’èst rén. Ça n’  
vaut nén lès pwin.nes d’ è cauzer”, lî a  
réspondu s’ moman. L’popa s’a rècrésté èt dîre  
inte sès dints : “Dji l’ avéve todi dit k’ vos èstî  
ène vrêye gâtée”.

\*

M’ matante si disputéve avou s’n’ ome :  
“Dj’èstéve Bén sote li djoû ki dji m’a marié avou  
vos !” “Èt mi tro plin po m’ è rinde conte !” ki  
m’mononk lî avéve réponse.

\*

Fauréve todi tûzer deûs côps à c’k’on va dîre.  
Parètréve ki l’ brût a coru à Transène k’on vî  
ome a disparètu après ène visite. Rivnant d’on  
voyâdje au Marok, on Lucyin (?) Moyin l’ aréve  
bistoké d’ ène lampe di pa-vêla L’djoû k’èle a  
stî rchuréye, in nûton èdjalabé è nn’a rèchu èt  
promètu au vî d’ lî ècsaussî trwès sowêtâdjès :  
on a rtrové dvant s’ maujone ène tote novèle  
Mèrcédès, dsus l’ tauve dèl’ cùjène ène plin.ne  
banse d’ euros-biyèts...S’ bèle djon.ne  
bauchèle vijène èst co à s’ dimander pokwè s’  
*tanpaks* avéve l’ èr di trianer kan èle l’a tapé  
au batch.

\*

## GRÎJÈLÈTE (à l’après d’ Pèrôlt)

Au pîd dès fwârts wôts tiènes,  
D’èvou l’ richot soûdant dzo lès bouchnisses  
S’ ènonde èt èva stinde dins lès plènes  
Sès eûwes, télmint frisses,  
Vikéve on djon.ne èt vayant Prince :  
Dès delîsses di s’ Province :  
L’ Ciél, è s’ ovrant, dsus li comacha tot,  
Lî d’nant tot ck’ i gn’a d’ copumia  
N’ wurdant po l’s ôtes pus rén do pot  
Ki dvéve sièrvu po lès pus bias.

Avou totes lès bistokes po s’cwâr èt s’n’âme,  
l’ èstéve fwârt, subtil, bati po ièsse soûdard,  
Mins, do mitan d’ li, ène drole di flame  
Lî bouta èto l’ feû po tos lès Arts.  
In.mant lès bates, il in.ma lès victwêres,  
Lès grandès vizêyes, lès akés di coradje,  
Èt tot cki po lèyî ène sakwè dins l’ istwêre  
Mins s’ bon keûr, todi dsus s’mwin,  
Il a volu po audjoûrdû l’ vrêye glwêre  
D’awè s’peûpe bineûrèû sins ratinde dimwin.

C’ timpéramint si èroyike  
A stî noyî pa dès sombès nûlêyes  
Ki, grigneûses èt neurasténiques,  
Rimplichîne s’ keûr di buwêyes  
Ewou n’dansîne ki dès mwêjès coméres.  
Dins lès feûmes pont d’ mèrite,  
Rén k’dès âmes fwârts ipocrites  
N’vèyant k’leû prope intèrèt,  
On fèl in.nmi ki sins djoke assatche,  
Djusk’a c’k’èle loye au batch,  
L’ome ki lî ara trové d’ l’ agrè.

A si sovènt voye autoû d’ li  
Dès omes cauzu à plat vinte  
Choûter d’leûs feûmes, lès mintes  
K’èles ni purdéve pus lès pwin.nes di rèli,  
I s’a Bén djuré d’pus d’ én côp  
K’min.me si l’ Ciél li èvoyéve ène novèle Lucrèce,  
Il l’riwêtréve di krèsse  
Èt nén s’lèyî mète di tchin.ne au cô.

A l’ pikète do djoû râde à l’ ovrâdje,  
Po mète dsus voye Bén paujèrmint,  
Sins grand tapâdjès,  
Lès afêres do govènimint,  
Disfinde lès orfulins, lès veuves sins liârd,  
Mète tot dins l’ bon drwèt,  
Rabate dès intèrèts d’ritârd,  
Èt l’ cakèt d’ bankîs tro rwèds,  
Todi, à l’ après-nonne  
Èvoye do costé d’ Malon.ne,  
Dins lès bwès, à l’ tchèsse.  
L’ leû, l’ singlé èt lès ârmes  
Lî d’nîne mwins d’ alârmes  
K’ ène bauchèle dins ène fièsse.

Mins sès subjèts, à l’ voye insi,  
Tûzîne à pus taurd. I s’èstîne contint  
Mins, èt d’mwin ? I s’mèttîne à transi.  
Aléve-t-i leû dner on diskindant à tins ?

Lès vla don k’on matén i s’arivenut è binde  
Lî dmandant k’il ètinde  
L’ mèyeû dès plaideûs  
Apèlé à vnu disfinde  
Leû idèye ki faléve ièsse à deûs  
Èt tèvozè s’î rprinde  
D’pus k’ène fiye.  
K’après tot, ratinde  
Ça raffiye.  
I radjoutéve min.me ki, kèkfiye,  
S’grandeû  
N’aréve nén à s’ è plinde.

Avou dès mos pu simpes èt ène mwins fwate vwè,  
L’ Prince répondit k’il î vinrèt, mutwè :

(sayète di fauve à chûre, si ça vos tchante...)

On saye di continuer à tot comachî...